

**Scott Reagan, der Blohbariye**  
aus Naddhampton Raundi, Pennsilfaania  
beim Pfälzischen Mundartdichter-Wettstreit  
Bockenheim an der Weinstraße, 19.10.2024

**Unser Bariye**

*(Wadde un Musik vun Scott Reagan)*

Selle sin unser Bariye – sie waere noch datt sei demariye  
Ihr Aussicht binnt uns alle zamme, vum Wescht noch Oscht  
wu mir sin entschtanne.

Die Kittatinni hen sie gheese, schunn vor langer Zeit –  
odder die endlose Bariye, der Nadur ihr schee Geschenk  
fer uns deitsche Leit.

*Selle sin unser Bariye  
Unser scheeni Bariye  
Sell iss deheem*

Vum Delaware Rewwer un der Wasserkraft  
Nooch Wescht in Richdung gleeni Nazret  
Datt bin ich deheem wu mer seht die Windkraft  
Un uffm Land wu uns der Schlaetbarig\* gafft.  
Datt sehne die Bariye wie Bufflos\* aus  
Am renne darrich den Himmelreich  
Awwer sie kumme nimmi nariyets voraa...  
Sie bleiwe fer ewich datt un flischbere 'Mir sin do fer eich'.

*\*Schieferberg*

*\*Büffel*

*Selle sin unser Bariye  
Unser scheeni Bariye  
Sell iss deheem*

— — — —

Sin sie blo odder sin sie gro, unser scheeni Bariye sin fer immer do...  
Im Winder sin sie ebmols mit Schnee gegront  
Wann vun riwwer der Barig viel schtaricker Wind blost.  
In der warme Zeit sin sie grie oder veiolich  
Weithie kann mer sehne unser Freinde so riesich  
En Seidreck iss alles was mir ken Sinn macht –  
Solang die Bariye datt sin nemm ich druff ken Acht.

## Grundsauloch

*(Wadde un Musik vun Scott Reagan)*

Gleene Grundsau in dei Loch  
Kannscht schunn mol raus – sei doch ken Ochs  
Gleene Grundsau, die Veggel singe  
Kumm, aus ‘m Bett, nau – duh mol e paar Dinge

*Die Welt kennt uffheere  
Un alles zu nix waere  
Un mer bleibt am schlofe alsfatt noch.  
Mir sin yuscht e Schtaabfleckli  
Aeryets dattdrunner dief  
Im dunkle Grundsauloch*

Gleene Grundsau, der Winder iss verbei  
Schpiel mol im griene Graas mit de annere Grundsei  
Gleene Grundsau, ‘s reggert doch hatt nau  
Du kannscht ruhich in dei begweeme Loch bleiwe  
Du kummscht erschd schpaeder aa in die Reihe

*Die Welt kennt uffheere  
Un alles zu nix waere  
Un mer bleibt am schlofe alsfatt noch.  
Mir sin yuscht e Schtaabfleckli  
Aeryets dattdrunner dief  
Im dunkle Grundsauloch*

## Der Alt Weidebaum

(Wadde vun Eli Keller, arr. S. Reagan, Musik vun S. Reagan)

Im unn're Schwamm, dicht an der Grick\*,  
Datt schteht en alter Wasser-Weide ;  
Der Dopp\* iss hoch, der Shtamm is dick,  
Mit lange Nest uff alle Seite.

*\*Bach*

*\*Krone/Wipfel*

En Schpring is aa gans dicht dabei,  
Mit grosse Schtee, ringsum gemauert ;  
Sin Blumme datt, un allerlei –  
En Bullfrog\* sitzt, un schnauft, un lauert.

*\*Quelle*

*\*Ochsenfrosch*

---

Im Friehyaahr iss der Baam en Luscht,  
Wann mol die erschde Lerche singe,  
Un setze sich, mit goldner Brust,  
Gans owe, uff die dinne Schwinge.

Der gans gross Baam, bis owe naus,  
Is voll vun luscht'ge Creadure ;  
Die Hummle, Ieme – Was en Gesaus!  
Un en Getick, wie dausend Uhre!

---

---

‘Sin Veggler drin, yust harch mol recht!  
Ich heer sie wohl, un kann kens sehne –  
Ya doch, yust guck! Datt iss'n G'fecht ;  
Sin viel devun, un lauter kleene!

Wann so en Baam net luschdich iss,  
Schun in de erschde Friehyaahrsdaage,  
Dann mach ich mich graad uff die Fuuss,  
Un hab ken Waertche meh zu saage!

## Hett ich zwee Geesli

(Wadde un Musik vun S. Reagan)

Hett ich zwee Geesli  
Yung un schee sin sie  
Mit zwee gleeni Haerner  
Un hinnich e Schwensli  
Sie schpiele un tschumpe\*  
Un meini Finger gnawwere  
Sie schwetze mit mir  
Un ich nenn sie Lumpe

\*springen/herumtollen

*Meini zwee gleeni Geesli  
Daede gans gut lewe  
Ich daet fer sie alsfatt  
Daags und nachts sarye  
Ich daet sie alsfatt liewe  
Wann ich sie mol hett*

Hett ich zwee Geesli  
Luschdich un haarig  
Sie sin ebmols Schnickelfritze  
Doch ich bin fer sie arig  
Un ich bin yo geduldich  
Un ich daet mich nimmi verzanne  
Mit meini zwee gleeni Geesli  
Doch ich muss noch uff sie waarde

*Meini zwee gleeni Geesli  
Daede gans gut lewe  
Ich daet fer sie alsfatt  
Daags und nachts sarye  
Ich daet sie alsfatt liewe  
Wann ich sie mol hett*

Ich hett vor dem Dode  
Ken Faricht, nee, ken Faricht  
Meine Geesli un ich  
Gehn mitenanner in die Karich  
Dattdrowwe im Himmel  
Hett ich zwee gleeni Geesli  
Mit rein weissli Belsli  
Un yeder zwee Fliggel

## Nixnutz

*(Wadde un Musik vun S. Reagan)*

Wann ich noch e glee Bu waar  
Hot die Maemm zu mir gesaat  
Ich waer dich alsfatt schutze  
Doch musscht es Haus mol butze  
Kumm, helf mir mit 'em Fege  
Un die Wesch reibringe vor 'em Regge  
Un fiederscht not die aldi Wutz  
Sei doch net so en Nixnutz

-----

Die Hinkel fiedre un Oier sammle  
Die gehn yo glaar beisamme  
Un dennot gebt's noch was fer dich  
As dei Nutz zuletscht mol richt  
Du kannscht emol 's Briwwi\* butze  
Sell kennt mer yo schunn nutze  
Kumm, duh des mol un unne Fuss\*  
Sei doch net so en Nixnutz

*\*Latrine/Außentoilette*

*\*Getue*

*'S iss yuscht ee Muss in der Welt  
Un sell iss: mer muss schtarwe  
Du weescht so wennich vun so Sach  
Wie en Sau vun Sundaag*

-----

Nau bin ich gaar ken Bu meh  
Ich bin en Mann, un yo verehrt  
Die Leit am Arwet gleiche mich  
Mich kennt yo yeder, bin so en Wix  
Doch kumm ich heem zu meinre Fraa  
Un schulder noch die Arwet datt  
Viel Sach zu duh duht sie mich draa  
Un ermaahnt mich, dummer Mann,  
Sei doch net so en Nixnutz

## Der Oktower

(Wadde vun John Birmelin, Musik vun S. Reagan)

Oktower, waerd's schun zimmlich kiehl  
Do waer'n mer Reife griege  
Der Wind rauscht in die hoche Baem,  
Mer sehnt die Schneegens fliege

Un rot un brau un goldegeel,  
So hot sich's Laab gedreht.  
Do sehnt mer iwwer Baerrig un Daal  
En Farweherrlichkeit.

Was sin die Winter-Ebbelbaem  
So voll un schwer gelaade.  
Die roppt mer dann am Burkhartsdaag  
Schunscht waer's verleicht zum Schaade.

Doch iss es aa en beesi Zeit  
Mit denne Hausbutzgichtre.  
Die Weiwer wisse immer'n Weg  
Fer Mannsleit eizuschichtre.

Do waerr'n die Effe ausgebutzt  
Noh muss mer Kaerpet\* gloppe.  
Mer glopt sich Blodre\* in die Hend,  
Gedraut sich net zu schtoppe.

*\*Teppiche  
\*Blister*

Un macht mer's denne Weiwer recht  
Wie lieblich duhn sie wischble.  
Mer grickt debei en G'schmack ins Maul  
As wie vun griene Mischble\*.

*\*Persimonen*

Ya, saag! Was hen die yuscht im Reff  
Uff eemol uns zu lowe?  
Die schmiere uns die Aage zu  
Un mir sin dumme Schwowe!

Die Buwe mache'n Kaerbseg'fress  
Un schtelle's in en Fenschter.  
Sie saage, dass uff Hallowe'en  
Do kaemte die G'schpenschter.

Deel glaawe noch an 'Aller Heil'  
Un alle gute Dinge.  
'S maag yeder glaawe, was er will  
Mer will doch niemand zwinge.

## **Sehn dich schpaeder**

*(Wadde un Musik vun S. Reagan)*

Wann du net meh weescht  
Wos um Gottes Wille mer im Lewe sehnt  
Un du kennscht ken Weg  
Drumrum wos dir im Wege schteht

Wann du draa der Leede hoscht  
Un dei Wille zum Aushalde iss all  
Un du hoscht gfrogt un gfrogt  
Doch es endlose Dreiwae waert dir endlich alt

*Sehn dich schpaeder  
Mach's gut  
Ich zieg vor dir  
Schunn schee der Hut  
Loss der siesse Wind der blost  
Dich weiderdreiwe*

*Sehn dich glei  
Denn es Lewe  
Geht vorbei im Aageblick  
Doch bis dohie  
Wunsch ich dir  
Gudes Glick*

Wann du net meh lanne witt  
Wos mer gaar net wisse kennt  
Un du fiehlscht dich fescht in der Mitt  
Vun em End

Wann du es End vum Lied  
Liewer als der Aafang heerscht  
Un's waer dir yuscht so lieb  
Der kalde Winder zu hawwe ass der Haerbscht

*Refrain*

*(Reggedropfe falle aahaldend uff m Kopp)*

Scheener Owed  
Gude Nacht  
Der Schlof iss kumme  
Der Dod lacht dich aa  
Un ich hoff du finnscht was  
Schee un froh un luschdich...  
Uff der annre Seit

*Refrain*

# Friedensbottschafft

(Wadde un Musik vun S. Reagan)

Es dunnert lang un 's dunnert hatt  
An so en Friehtyaahrsowed zaart  
Wu mir drin in Ruh un Friede hocke  
Ariyets sunscht fiehrt Krieg mit Bombe

Un so schreib ich daere Friedensbottschafft  
Un ich meen 's recht aernschthafft  
Es kummt doch net nur die Landschaft in Gfaahr  
Awwer aa die ganse lewendiche Scharr

*Die Welt iss weit un voll vun Leit  
Un ich kann's net verschteh  
Ferwas mir schtreide un zu schlachde eile  
Fer ebbes ach so glee...*

“Die Gschicht waert uns nix lehre”  
Hot 'n gscheiter Mann gsaagt,  
Un so wie bei de siesse Hemmbeere,  
Geb uff die Danne Acht.

Un so saag ich daere Friedensbottschafft,  
Un ich hoff es gebt eich Graft.  
'S iss yo alles e Sinn un e Schann,  
Doch somehow\* ewe gebaelenst.

*\*irgendwie*

*Die Welt iss weit un voll vun Leit  
Un ich kann's net verschteh  
Ferwas mir schtreide un zu schlachde eile  
Fer ebbes ach so glee...*

-----

Wie lang waert's fattdauere?  
Wohl en Yaahr odder meh...  
Der Dod hot Gescheft zu duh,  
Zaahlos Heife dezu...  
Wie kann mer blooss weidermache  
Wann mer verlangt yuscht Raache?  
Un die Schtill un Gram gehn nimmi weck  
Bis alles schee verreckt...